

Benny Nisbet:

UN ACUERDO ENTRE EXXON Y GOBIERNO TA HABRI PERSPECTIVANAN NOBO PA ARUBA

ORANJESTAD(AAN) -- Parlamentario Benny Nisbet a indica cu manera pueblo por a lesa den diferente corant local, Gobierno di Aruba tin posibilidad di yega na un acuerdo final cu Exxon encuan to tur "issue" cu a keda pending entre nan dos.

Segun Benny Nisbet, un acuerdo entre Gobierno y Exxon lo ta na beneficio di e isla y ta habri perspectivanan nobo pa Aruba cu desaroyo pariba di brug.

Un acuerdo den cual ta finaliza tur disputa entre Gobierno y Exxon, un acuerdo den cual tur tereno na Grapefield y Seroe Colorado cu ainda ta den man di Exxon lo pasa pa Gobierno, un acuerdo na unda Exxon ta cumpli grandemente cu cierto margen di "clean up" lo ta na beneficio di e pueblo.

Nisbet a sigui bisa cu por tene cuenta cu varios aspecto:

1. Pueblo di Aruba lo por bay libremente pa e beachnan publico cu ta di nos pueblo;

2. Decisionnan di maneho encuan to futuro di e terenan lo por worde tuma door di Gobierno sea esun actual den e aña cu ta dilanti porta of door di e Gobierno cu pueblo lo mester eligi den eleccionnan na final di aña;

3. Pues un acuerdo asina ta habri un era nobo di perspectiva.

Manera pueblo sa caba e informenan cu a worde duna na pueblo den pasado cu Ariba tin derecho ariba un suma substancial no ta cuadra cu berdad.

Nisbet a indica cu Aruba a perde varios caso dilanti Juez, hasta a resulta cu Aruba lo debe Exxon un suma di 50 Mijon Florin.

E asunto di claim ambiental cu nunca a worde cuantifica real ya cu Gabinete Eman no

a laga Grondmij traha e segundo rapport, pero den boca di pueblo ta conoci como un claim ambiental di 250 Mijon Dollar tampoco no tey mas.

Segun Nisbet, e claim aki a cuminsa desminui door di e acuerdo cu Gabinete Eman a firma cu Exxon na 1987 y na Januari 1988, e asina yama dismantling agreement, na unda Gobierno di Aruba a reconoce e principio di "as is, where is".

El a sigui bisa cu despues cu e principio aki a keda acepta pa Gabinete Eman den dos acuerdo, esaki a dificulta e posicion di negociacion di gobernacion den futuro.

Exxon comprendiblemente a keda para ariba cu tur otro acuerdo mester worde mira como addendum di e acuerdo di Gabinete Eman di Januari 1988 cu e principio menciona "as is where is".

Pues na e momento aki gran mayoria di e tereno ya ta den man di Gobierno di Aruba a base di e principio aki y si analisa Aruba su otro interesnan, anto no ta vale la pena pa sigui lucha pa algo cu no tey.

Nisbet ta haya cu mester cambia e pagina y cuminsa un pagina nobo ariba e cuestion aki.

El a enfatisa cu PPA ta spera cu Gabinete Oduber cu ya caba tin un racha di logronan ariba su nomber lo logra

tambe un acuerdo final cu Exxon cual acuerdo lo duna perspectivanan nobo pa desaroyo di Aruba den e caso aki pariba di brug.